



Schnitzulbank 1997

Fasnachtsgesellschaft Muotathal

Guet Tag midenand lär liäbä Lüt
lär sind üs herzlich willkommä hüt
lär wettid wieder wüssä was ds letscht Jahr isch glauffä
das cha jedä vernäh, wänn är tuäd ä Schnitzelbank chauffä.

Wenn einä scho dr Wäg i das Blettli duet gfindä
äso muess är wägedem nu witniänä afä spinnä
Da drinä näm miär jedä, isch är gross oder chli
isch im Riäd vor oder im Bisisthal innä gsii.

Hür cha d'Fasnachtsgesellschaft jubiliärä
drum hemmiär ä Pin la kreiarä
50 Jährli, das isch ä schöni Zyt
miär hoffid, dass bi jedum einä dinnä lied.

Ufum Schuälareal tüänd 4 Manögglä stah
äs weiss gläbi niämer gnau, um was dass sött gah
das isch Kunscht, tüänd drna fürig meinä
ich wett zwar frifrank vrgäbe wit niänä keinä.

Idr Chelti ussä tuäd niämer gärä sie
dä hend schiär all gärä warmi Chleidr drbie
das hend sich gläbi au d'Nachtbuäbä gseid
drum hends ufä Wintr hi diä 4 Kreaturä ahgleid.

Dr Wallfahrtsort Küssnacht hed au Gä zredä
um Färnseh hends es zeigt, abr nüd jedwedä
au Muotitaler hend det irä Glaubä verträätä
inäs Puff gönds normal abr nüd ga bätä.

Äs hed ä Älpler uf dr Oberallmig Wasser gleitet
duä hend d'Wildhüätär gmeint, är machi ä Wäg, ä breitä
inäklagt hendsi abr dr lätzi Maa
und dr Gmeindschribr tuädnä natürli änu bschtah.

Hindärum Hus stahd äs Auto Farbe blau
diä Frau hed das aagluägt nüd äso gnau
ihrä Güsel hed si i das Auto entsorgt
ächli spetr hed duä mäni einä gredt äs paar Wort.

I Rotäturä ufä hed der guäti Maa wellä
idr Geografie chamänä gläbi nüd zu dä beschtä zellä
uf dr Autobahn gägä Zug hedr nümme gwüsst wohih
drum ischr änandäränah widr gägum Tal durih.

Mit denä Tschöpänegr chamä guät redä
märchtä midnä tuäd nüd jetwedä
is Meitschä hendsä mid Füfliebr beworffä
ich glaubä diä hend scho gha vielzviel gsoffä.

Inä Garasch inäfahrä chönid gläbi di meischtä
äso BÜülä und Chritz cha sich nüd jedä leischtä
einä hed abr nüd ämal z'Tor uuftah
är hed tänk für d'Heizig anu öppis wellä hah.

Äs Rotliächt isch gsie im Horä ussä
det heigids müässä Glas zämawuschä
Polizii hends duä ä keini greicht
äs hed dr Polizischt mäni sälbr preicht.

Färä hend d'54er chönnä ga abgäh
einä heds Gwehr vrgässä midumznäh
äs Klarinett und ä Trummälä hedr binum ghah
z'Gwehr hed duä nu ächli chönnä idr Bachschtubä stah.

Übärä Chloschtrschtäg midum Auto hed wellä ä jungä
hedr ächt z'breits Auto gha odr ischr gsie z'tummä
uf jedäfall hedr nüd mögä i einerschtä durä
medä zwee Schtund heigr det müässä surä.

Raukä tüänd nüd all glich viel
ächli wenägr odr garnüd wär amängum z'Ziel
vo allnä Markä hed der Purscht wellä
är hed medä 400 Frankä müässä usäzellä.

Färä dä Summr heds im Ahoräbärg Geissböck ghah
einä hätts gläbi liäbr nüd bi sinä Gitzi ghah
är hed diä Böck am Auto aaghänkt und heizehrt
mit denä bluätägä Chnüü henzäsi nummä hüntsch gwehrt.

Ä Puur tuäd hiänta ächli komisch schaltä
hedr ächt diä Chuäli im Augschtä scho wellä la ärgaltä
früahs Heu hednä är duä inä grasät
duä hends idr Milch fiartig baasäd.

Im Gruäbizug tüänds Lauivrbuuägä mondiärä
öppr tuäd abr gläbi artig kombiniärä
zerscht hends det müässä dr Wald hauä
hür dä Wintr isch rati gfährlächr, det bruchts kä Schlauä.

Einä hed d'Nacht um 3 afä Plaschtik vrbrännä
är wär susch gnuäg wiit vom Huusli dännä
bis i d'Muota durä hättr zwar nüd müässä
d'Polizii hedä duä gliich gfundä zum Püässä.

Au im Sunnähälb isch d'Nacht timmr
wämä ächli trunkä hed, dä isch nu schlimmr
sis Huusli hed det einä gsuächt
är hed duä zerscht nu d'Nachbuurä psuächt.

Amä Sunnähälblr hed äs Auto brunnä
är isch usinnig umägschprungä
mid Milch heds der Maa duä afä fletzä
dr Gschmack tägr hüt nu usinnig schetzä

Dr Scharverein hed sini Uszahlägä gmacht
diä Mitgliedr hend duä trunkä und au glacht
midum Auto hei am Morgäd, das isch nüd gratä
si hend duä müässä bis Nachiläs wartä.

Am Chiläfäscht im Bisistal isch änu öppis glauffä
d'Behörde hed det gläbi z'Trinkä nüd alls müässä chauffä
si hätid vilicht söllä vom türärä Wii näh
dä hät dr eint nüdäso gützwis müässä usägäh.

Im Summr hends ufärä Alp Schwarzäs gsoffä
einä hed det dr Nagul ufä Chopf troffä
is Sännchessi inä troläd isch är grindsvorah
usä hedr nüd älle chönnä, der bsoffnig Maa.

Schpaniä wird au vo Muätitaler bsuächt
4 fuf hend det vrgäbä ihrä Uswiis gsuächt
all hend ihräs Billet vrgässä dähäimä
ga Tschepfährä hed duä dörfä ä keinä.

Au üsi Purä sind uf Bärn ga demonschtriärä
für all hed das abr nüd wellä rändiärä
d'Polizii hed duä änu Tränägas im lizat ghah
di gwüssnä hend duä ihri Triichäli müässä dobä lah.

Einä hed ghah usinnig dr Füdläschmirz
gseh wordä isch der Maa ussäts Sunnawirts
bim Trog hed är sich gag das Lidä gwehrt
är isch duä nachr subärä iikehrt.

Im Usgang hend diä zwee ihräs Gschäft chönnä vrgässä
mä hättnä gläbi schiär dörfä d'Fiäbr mässä
ihri Undrhosä hends inä Fahnästangä ufäzogä
passiärt isch das bis Schnäpfä obä.

I letschtr Zyt wird üsäs Tal vom Färnseh heigsuächt
si hend det vrschidäni Lütli bsuächt
äs isch ja rächt dass au zeigid di armä
wenägr hed adä Lüt gfallä dr Teil vodä Warmä.

Ä Lehrär sött fümäs Chind äs Vorbild sie
bsundrs wänns sind nu zimmli chlii
ä 92er Nummärä am Welo sött mä nümmä hah
dr Polizischt hedum duä ä Chettänä dra tah.

Einä hed ussätum Huus dr Umschwung gmacht
duä hend d'Nachbuurä au obum glacht
midum Walzäli ischr nümmä vom Huus äwäg choh
der midum Chranä hedum duä gheuschät dr Loh.

Ä Frau isch is Nachbuurs Gartä uf d'Leitärä gschtigä
dass si alls gsehd ischi ächli lengr drfobä blibä
dr Wundernaas hed duä nümmä appä chönnä
ich weiss öppr, är magäräs vo Härzä gönä.

Wänn einä tuäd ä Hund drässiärä
söttärä nüd grad z'hüntscht traktiärä
z'totschlah hedärä zwar nüd wellä
är hed duä ä frischä Triibhund müässä bschtellä.

Arbäd gid äso ä Schnitzulbank z'dichtä
d'Lüt wüssid drnah au eh öppis z'brichtä
idr Fasnacht söttmä abr äs Gschpässli ärliidä
suscht tuäd mä um beschtä däheimä bliibä.

Soo, ich glaubä äs täts jetzt wieder fümäs Jahr,
das wo miär gseid hend isch mee oder mindr wahr.
Wänn einä meint är chöns bessär bringä,
dä chanär z'nächscht Jahr ä guhälfä singä.